



USAID
FROM THE AMERICAN PEOPLE



PRAVILNIK

o načinu i uslovima korištenja sredstava u okviru projekta „Program podrške konkurentnosti malih i srednjih preduzeća kroz razvoj ljudskih resursa, bolji pristup tržištima i sertifikacijskim procesima“ za podršku privrednim društvima u aktivnostima obuke radne snage; uvođenja, sertifikacije i resertifikacije standarda kvaliteta; i pristupa tržištima

Član 1.

Pravilnikom o načinu i uslovima korištenja sredstava za podršku privrednim društvima u aktivnostima obuke radne snage; uvođenja, sertifikacije i resertifikacije standarda kvaliteta; i pristupa tržištima (u daljem tekstu: Pravilnika) definišu se aktivnosti koje se finansiraju u okviru projekta „Program podrške konkurentnosti malih i srednjih preduzeća kroz razvoj ljudskih resursa, bolji pristup tržištima i sertifikacijskim procesima“ (dalje u tekstu: Program podrške), uslovi korištenja sredstava za podršku, ciljevi i kriterijumi za ostvarivanje prava na korištenje sredstava za podršku, formiranje Odbora Programa podrške za izbor korisnika sredstava, način isplate i rokovi za realizaciju aktivnosti, kontrola i nadzor korištenja sredstava za podršku i obaveze koje korisnik sredstava mora ispuniti prije i nakon dobijanja sredstava za podršku, te nadgledanje i ocjena postignutih rezultata.

Član 2.

1) Program podrške privrednim društvima namjenjen je malim i srednjim preduzećima koja posluju u sektorima drvoprerade, metaloprerade i tekstila/obuće, za sufinansiranje sljedećih aktivnosti:

- Obuke radne snage kroz programe osposobljavanja, dokvalifikacije, prekvalifikacije ili kroz angažman konsultanta/trenera za određenu oblast,
- Uvođenje, sertifikacija ili resertifikacija sistema upravljanja kvalitetom i/ili proizvoda,
- Pristup tržištima, odnosno aktivnosti koje će direktno uticati na povećanje obima prodaje i izvoza, kao što su npr. aktivnosti promocije, izlaganja na sajmovima, B2B susreti i sl.

2) Korisnici sredstava za podršku za sufinansiranje aktivnosti iz stava 1) ovog člana mogu biti privredna društva, grupe privrednih društava i organizacije koje sprovode navedene aktivnosti za privredna društva (npr. trening centri, poslovne asocijacije i sl.).

3) aktivnosti iz stava 1) ovog člana, treba da doprinesu ostvarenju sva tri definisana cilja Programa podrške, i to: povećanju broja zaposlenih, povećanju prodaje i povećanju izvoza.

4) Ukupan iznos sredstava Programa podrške iznosi KM 70,000.00 od čega je KM 60.000,00 obezbjeđeno kroz Ugovor o grantu sa USAID projektom „Razvoj radne snage i većeg pristupa tržištima“ (WHAM), i KM 10.000,00 kroz finansijsko učešće Grada Prijedor.

5) Sredstva podrške će se dodjeljivati u toku dva ciklusa odabira privrednih društava. Prvi javni poziv za selekciju privrednih društava će biti objavljen u maju 2018. godine za implementaciju aktivnosti iz stava 1) ovog člana u periodu juni – oktobar 2018. godine. Drugi javni poziv, predviđen je da se objavi u oktobru 2018. godine po uspješnoj implementaciji aktivnosti i ostvarenim rezultatima u odabranim privrednim društvima iz prvog ciklusa odabira korisnika Programa podrške. Period implementacije odobrenih aktivnosti u drugom ciklusu odabira privrednih društava je novembar 2018. godine - februar 2019. godine.

Član 3.

1) Pravo na sufinansiranje aktivnosti navedenih u članu 2. stav 1) ovog Pravilnika imaju mala i srednja preduzeća koja posluju u sektoru drvoprerade, metaloprerade i tekstila/obuće, sa planovima zapošljavanja lica na području Grada Prijedora, bilo da se prijave individualno, kao grupa preduzeća, ili kroz organizaciju koja pruža uslugu privrednim društvima (npr. trening centar, asocijacije, i sl.).

2) Pravo na korištenje sredstava iz Programa podrške ne ostvaruju privredna društva koja su već realizovala aktivnosti navedene u Prijavi (ne mogu se retroaktivno koristiti sredstva za realizovane aktivnosti).

3) Korisnici Programa podrške mogu biti samo privredna društva koja pristaju na nadgledanje i izvještavanje o korištenju sredstava i postignutim rezultatima, što će se regulisati Memorandumom o razumjevanju između Agencije za ekonomski razvoj grada Prijedora „PREDA-PD“ i odabranog privrednog društva ili organizacije za sprovođenje odobrenih aktivnosti navedenih u Prijavi.

Član 4.

1) Sredstva iz Programa podrške dodjeljuju se na osnovu javnog poziva objavljenog na internet stranici Agencije za ekonomski razvoj grada Prijedor „PREDA-PD“.

2) Javni poziv za korištenje sredstava Programa podrške će biti objavljen dva puta u toku 2018. god. Prvi javni poziv će biti objavljen **10. maja 2018. godine** za odabir preduzeća koja će implementirati jednu ili više aktivnosti iz člana 2. stav 1) ovog Pravilnika u periodu juni – oktobar 2018. godine. Objavljivanje javnog poziva za drugi ciklus odabira preduzeća se očekuje u oktobru 2018. godine za aktivnosti iz člana 2. stav 1) ovog Pravilnika koje će se implementirati u periodu novembar 2018. godine - februar 2019. godine.

3) Javni poziv sadrži uslove za korištenje sredstava Programa podrške, kriterije za dodjelu sredstava, te rokove za dostavljanje prijava i rokove za implementaciju odobrenih aktivnosti.

4) Obrazac za prijavu na javni poziv iz stava 1) ovog člana nalazi se u Prilogu I ovog Pravilnika i čini njegov sastavni dio.

5) Javni poziv može biti objavljen i na internet stranicama USAID WHAM projekta i Grada Prijedor, kao i u lokalnim medijima.

6) Po objavljenom javnom pozivu i pristiglim prijavama privrednih društava do definisanog roka u javnom pozivu, Odbor projekta će vršiti selekciju privrednih društava na osnovu sljedećih parametara:

- MSP iz sektora drvoprerade, metaloprerade, tekstila/obuće,
- Aktivnosti koje su predmet podrške u skladu sa aktivnostima navedenim u članu 2.stav 1),
- Period implementacije aktivnosti u skladu sa definisanim rokovima iz javnog poziva;
- Rezultati (nova radna mjesta, povećanje prodaje i izvoza),
- Zapošljavanje žena i mladih će dodatno uticati na pozitivno ocjenjivanje,
- Priložena tražena dokumentacija (uvjerenje o izmirenim poreskim obavezama, finansijski izvještaj za prethodni obračunski period i tri ponude za aktivnost/uslugu, ukoliko je moguće, a ukoliko nije, npr. ukoliko se radi o specifičnoj usluzi gdje ne postoje tri ponuđača, navedeno odgovarajuće obrazloženje),
- učešće privrednog subjekta u troškovima aktivnosti najmanje 50%, a veći nivo učešća je poželjan i utiče na pozitivno ocjenjivanje,
- aktivnosti nemaju uticaj na zagađenje životne sredine,

Član 5.

1) Sredstvima iz Programa podrške mogu da se sufinansiraju sljedeći troškovi:

- Do 50% troškova za aktivnosti obuke radne snage;
- Do 50% troškova za aktivnosti uvođenja, sertifikacija ili resertifikacija sistema upravljanja kvalitetom i/ili proizvoda;
- Do 50% troškova za aktivnosti pristupa tržištima, odnosno aktivnosti kojima će se direktno uticati na povećanje obima prodaje i izvoza;
- Do 50% troškova programa koji obuhvata kombinaciju gore navedenih aktivnosti;

Privredno društvo – korisnik sredstava je u obavezi da sufinansira odobrene aktivnosti u minimalnom iznosu od 50%.

2) Metodologija realizacije podrške:

a) Privredno društvo – korisnik sredstava podnosi Prijavu za korištenje sredstava na propisanom obrascu (Prilog I Pravilnika).

b) Privredno društvo – korisnik sredstava dužan je da uz prijavu priloži tri ponude davaoca usluga, ukoliko to specifičnost usluge dozvoljava i da objasni zašto je odabran određeni ponuđač, u slučaju da nije izabrana najpovoljnija ponuda. Uz prijavu je neophodno priložiti i bilans stanja i uspjeha za posljednji obračunski period (2017. god) i uvjerenje o izmirenim poreskim obavezama koje nije starije od 3 mjeseca.

c) Po odabiru privrednog društva za aktivnosti navedene u prijavnom obrascu od strane Odbora projekta, Agencija za ekonomski razvoj grada Prijedor „PREDA-PD“ potpisuje Memorandum o razumjevanju sa privrednim društvom o regulisanju međusobnih prava i obaveza. Memorandum o razumjevanju će biti naknadno dostavljen privrednim društvima koja su zadovoljila kriterijume i odobrena od strane Odbora projekta.

d) Po potpisanom Memorandumu o razumjevanju, korisnik sredstava za podršku će angažovati odabranog ponuđača koji će izvršiti uslugu/aktivnost u skladu sa planom implementacije iz Prijave.

e) Po završenim aktivnostima, korisnik podsticaja plaća uslugu, dostavlja dokaze o izvršenoj aktivnosti i postignutim rezultatima i predaje Agenciji za ekonomski razvoj grada Prijedor „PREDA-PD“ Zahtjev za refundiranje sredstava (Prilog II).

f) Dokazi o izvršenoj aktivnosti i postignutim rezultatima iz stava 2) tačke e) ovog člana podrazumjevaju dostavljanje relevantne dokumentacije za verifikaciju implementacije odobrene aktivnosti iz Prijave, dokaze o novom zapošljavanju i povećanju prodaje i izvoza. Dokazna dokumentacija podrazumjeva:

- Ugovor sa davaocem usluga,
- Izveštaj o izvršenoj usluzi/aktivnosti,
- Račun za izvršenu uslugu,
- Dokaz o izvršenoj uplati davaocu usluga,
- Dokaz o namjenskom trošenju sredstava (npr. primjerak štampanog promotivnog materijala, fotografije sa sajma ili obuke, kopija sertifikata, popunjeni upitnici, i sl.),
- Dokaz o novom zapošljavanju (kopija PD 3100 formulara),
- Dokaz o povećanju prodaje i izvoza (upitnici koji će biti dostavljeni privrednim društvima nakon izvršene aktivnosti i periodično tokom trajanja USAID WHAM projekta i godišnji finansijski izvještaji tokom trajanja USAID WHAM projekta),

g) Agencija za ekonomski razvoj grada Prijedor „PREDA-PD“ zadržava pravo da zatraži dodatnu dokumentaciju i obrazloženje u vezi sa troškovima nastalim u postupku realizacije projektne aktivnosti.

h) Agencija za ekonomski razvoj grada Prijedor „PREDA-PD“ isplaćuje privrednom društvu sredstva iz Programa podrške kao naknadu troškova navedenih u dostavljenom Zahtjevu za refundiranje sredstava (Prilog II) i dokumenata iz stava 2) tačka f) ovog člana, kojima se dokazuje realizovana aktivnost i ostvareni rezultati. .

Član 6.

1) U skladu sa članom 5. ovog Pravilnika, nivo podrške privrednom društvu je uslovljen ostvarenim rezultatima i ne smije preći KM 1.300,00/po novom radnom mjestu, uz prosječno povećanje prodaje 10% na godišnjem nivou, i prosječno povećanje izvoza 5% na godišnjem nivou.

2) Visina odobrenih sredstava ne može preći 50% od ukupnih troškova, bez uračunatog PDV-a i ostalih poreskih obaveza. Troškove PDV-a i ostale poreske obaveze snosi korisnik podsticaja ili se namiruju iz učešća drugih strana, osim USAID WHAM sredstava.

Član 7.

1) Odbor projekta, na osnovu definisanih kriterijuma i matrice za ocjenjivanje jednoglasno vrši odabir korisnika sredstava.

2) Matrica za ocjenjivanje iz stava 1) ovog člana se nalazi u Prilogu III ovog Pravilnika.

3) Odbor projekta čine predstavnici svih institucija/organizacija koje su učestvovala u finansiranju Programa podrške.

4) Odbor projekta, u roku od sedam (7) dana od dana isteka roka navedenog u Javnom pozivu vrši ocjenu pristiglih prijava, utvrđuje listu uspješnih prijava i izvještava o rezultatima Javnog poziva.

5) Odbor projekta, na osnovu pristiglih prijava i dostupnih sredstava može da odredi manji nivo podrške privrednim društvima (do 5%) od okvirno navedenog u članu 6. stavu 1) i 2).

Član 8.

1) Privredna društva, ili grupa privrednih društava, kao i organizacije koje sprovode aktivnosti za privredna društva, a koja na osnovu javnog poziva ostvare uslove za korištenje sredstava Programa podrške zaključuju Memorandum o razumjevanju sa Agencijom za ekonomski razvoj grada Prijedor „PREDA-PD“.

2) Memorandumom o razumjevanju iz stava 1) ovog člana, definiše se odobreni iznos podsticaja (koji može biti do 50% od ukupnog troška za odobrenu aktivnost), rokovi realizacije aktivnosti, očekivani rezultati, te druga značajna pitanja.

Član 9.

1) Nakon potpisivanja pojedinačnih Memoranduma o razumjevanju sa korisnicima sredstava, Agencija za ekonomski razvoj grada Prijedor „PREDA-PD“ će vršiti redovno nadgledanje realizacije aktivnosti i pratiti realizaciju očekivanih rezultata.

2) Po završetku projektnih aktivnosti u pojedinačnim privrednim društvima, Agencija za ekonomski razvoj grada Prijedor „PREDA-PD“ dostavlja izvještaj Odboru projekta sa pratećom dokumentacijom i vrši refundaciju troškova privrednom društvu, uz prethodno odobrenje USAID WHAM projekta.

Član 10.

1) Nadzor nad sprovođenjem i izvršenjem odredbi ovog Pravilnika vrši Agencija za ekonomski razvoj grada Prijedor „PREDA-PD“, USAID WHAM projekat , Grad Prijedor, odnosno članovi Odbora projekta.

2) U slučaju da se u toku vršenja nadzora utvrdi povreda odredbi ovog Pravilnika od strane korisnika Programa podrške, Odbor projekta, na osnovu izvještaja vršioca nadzora, može odlučiti da se iznos odobrenih sredstava umanjí ili da odbije u cijelosti refundaciju troškova.

Član 11.

Ovaj Pravilnik stupa na snagu danom usvajanja od strane Odbora projekta i biće objavljen na Oglasnoj tabli i internet stranici Agencije za ekonomski razvoj grada Prijedor „PREDA-PD“.

Broj: IN 107.1/18
Datum: 10.05.2018. godine

Mišo Reljić
Direktor Agencije PREDA-PD

Partner:



Grad Prijedor